



INATSIARTUT

KALAALLIT NUNAATA
INATSIILIORTUI



Inatsisartut Allattoqarfiannit saqqummersinneqartoq
August 2018

Assit tamaasa:
Allatut nalunaarsimasoqartinnagu Inatsisartut Allattoqarfiat

Inatsisartut Allattoqarfiat · Postboks 1060 · 3900 Nuuk
inatsisartut@inatsisartut.gl · www.inatsisartut.gl



Oqaluttarfiup tunuani qarsaat qisummit qiperukkat

INATSISARTUNUT TIKILLUARIT

Inatsisartunut pulaartut Inatsisartut inersuat takorluukkaminnit mikineerarsuusoq oqaatigigajuppaat. Angigisassaangikkaluarlunili sammisanut inuiaqatigiinnut kalaallinut pingaarutilinnik aalajangiinissamut, angisutsimigut akornutaangilaq.

Inatsisartuni oqaluttarfiup tunuaniipput Jens Rosingip kusanartuliatuullit qisummik qiperukkat. Oqaluttuatoqqat malillugit tuullik kalaallit qajaata ilusilerneqarneranut tunngaviusimavoq, tuulliullu amia piniarnermi qaannami aarnussatut nassatarineqartarsimalluni. Nippaa-rissuunini tuulliup kalaallinut ilisarnaatigaa kimittoq, erinarsonerullu oqallorissutsillu timmiaatut isigineqarluni. Aamma tuullik tappilluinnartuuvoq arajutsisaqassananilu. Allannortoqaleraangat malussajasuuvoq qoqassiuminaalluinnartuullunilu. Tamanna aamma pissutigalugu tuullik nunatsinni Inatsisartut inatsisiliortutut aqqisususaanerannut ilisarnaatigissallugu tulluurtuuvoq, taamaattumillu Inatsisartut oqaluttarfiata tunuaniinnissaa tulluarluni.

Neriuppugut qppersagaq una Inatsisartut suleriaasiannik suliffimilutassani suliarineqartartunik pulaartutsinnut paasissutaajumaartoq.

Inatsisartut Siulittaasoqarfiat

LANDSRÅDEQARNERMIIT INATSISARTOQARNERMUT

Kalaallit Nunaanni innuttaasut oqartussaaqataa nerata oqaluttuassartaa nutaanerusoq Kujataani 1862-imi Avannaanilu 1863-imi aallartip-poq, taamanikkut Paarsisut (Forstanderskaberne) pilersinneqarmata innuttaasut inuuniarnikkut atugarisaasa pitsanngorsarneqarnissaat siunertaralugu. Paarsisut sumiiffinni ataasiakkaani sinniisoqarfittut atuuttussaasimapput sumiiffinni aaqqiangiissutinik inuttullu atugarisatigut ajornartorsiutinik iluarsiiartartussat.

Handelip (KGH-p) qinikkanit nakkutigineqanngitsumik aalajangiisuulluinnartumik inissisimanagera annikillisinniarlugu niuerneq inuiaqatigiinnilu allatigut allaffissorneq avissaartinneqarput Kalaallit Nunaanni niuertoqarfiit aqunneqarnerat il.il. pillugu inatsit ulloq 27. maj 1908-meersoq atuutilermat. Kalaallit Nunaat allaffissorinnikkut immikkoortunut marlunnit avinneqarpoq, aappaa Aasianniit kujammut aappaalu Ilulisaniit avannamut. Peqatigitillugu Kommunerådinik Landsrådinillu marlunnik pilersitsisoqarpoq. Kommunerådit kommunini 62-iusuni najukkami allaffissorinnikkut oqartussatut ingerlasussaasut, Landsrådit Avannaanut Kujataanullu marluviit nutaaliornerrupput suliasanik annertunerusunik tunngaviunerusunillu suliaqartartussat.



Avannaata Kujataatalu Landsrådiisa pokalii

Ulloq 7. august 1911 Kujataata Landsrådia siullermeerutaasumik

katersuuppoq. Tamanna Nuummi pivoq, sapaatip akunneralu ataaseq qaangiutiinnartoq Avannaata Landsrådia Aasianni katersuuppoq. Landsrådit ukiumut ataasiarlutik naapittarput suliassat nunap im-mikkoortuani atuuffigisaminnut tunngasut oqallisiginarlugit Dan-markimilu naalackersuisunut oqariartuuteqarniarlutik, aalajangiinis-samulli imatut periarfissaqartitaagatik.

Sorsunnersuup kingulliup Kalaallit Nunaata avatiminit avissaarsi maffigisimasaata kingorna inuiaqatigiit kalaallit ineriartorteqqin-neqarnissaat pisariaqalersimavoq. Aggustimi 1948-mi danskit ministeriunerata Hans Hedtoftip tikeraarnera isumaliutissiisum-mik G-50-imik kinguneqarpoq, tassani Kalaallit Nunaanni nutaamik aaqqissusseqqinnissamut inatsisissat nutaat arfineq-pingasuk siunniunneqarlutik. Inatsisissat taakku ulloq 27. maj 1950 akueri-neqarput, ilaatigullu kinguneralu taamanikkut Landsrådiusut marluk katinneqarmata ataasiinnanngortillugit Nuummi angerlarsimaffilin-



1951-imi Landsrådit siulliit inunnit qinikkat. Asseq: Arktisk Institut

nik ukiumullu ataasiarlutik naapittartussanik. Nutaamik aaqqissuus-sinerup malitsigisaanik angutit arnallu 23-leereersimasut tamarmik taasisinnaatitaalerput, pisinnaatitaaffillu tamanna nutaaq siul-lermik atorneqarpoq ulloq 29. juni 1951 innuttaasut Landsrådimut ilaasortaatitassaminnik siullerpaamik qinersimmata. Taamanikkut naalackersuinikkut suliniaqatigiiffeqanngilaq, qinigassanngortittullu kisimiillutik qinigassanngortittarlutik.

Erling Høegh ulloq 23. maj 1967 siullersaalluni Landsrådimut siulit-taasunngorpoq, Danmarkimi Styrelsimit toqqarneqarani, Landsrå-dimut ilaasortat akunnerminnit namminneq toqqagaattut. 1979-imi Namminersornerulernikkut Landsrådit Inatsisartunngortinneqarput. Namminersornerulernerup ukiuini siullerni Inatsisartut siulittaasuat taamatuttaaq Naalackersuisunut siulittaasuuvoq. Tamanna aatsaat 1988-imi allanngortinneqarpoq Inatsisartut Naalackersuisullu ta-marmik immikkut siulittaa-soqalermata. Taamatut ikaarsaariarneq Kalaallit Nunaanni inatsisartut aqqutigalugit innuttaasut naalacker-sueqataanerata eqqunneqarneranik taaneqakkajuttarpoq, tamatu-mani inatsisiliortussaataitasut atuutsitsisussaataitasullu ingerlatsi-nerinut killiliussat avissaartinneqarmata.

Inatsisartut tassaapput ataatsimiittartoqatigiit inatsisinik akuersi-sartut Naalackersuisullu tassaallutik inatsisinik taakkunannga, aqu-tsisuusut. 1979-imi namminersornerulernerup eqqunneqarneratigut Kalaallit Nunaat suliassaqarfiit tamarluinnangajaasa iluanni nammineq inatsisiliorsinnaallunilu aqutsisinnaalersimavoq. 2009-imi juunip 21-ani namminersulernerup malitsigaa suliassaqarfiit suli amerlanerusut akisussaaffigalugit tiguneqarsinnaalernerat. Suliassaqarfiit ikittu-innaat taamaallaat pineqanngillat. Taakkununga ilaatigut ilaapput inatsisinik atuutsitsinermut, illersornissamut aningaasallu suut ator-neqarnissaannut tunngasut.

Ulloq 21. juni 2009 Kalaallit Nunaanni Namminersornerup eqqunne-qarneratigut Kalaallit Nunaanni Namminersorneq pillugu Inatsimmi "Inatsisartut" pisortatigoortumik taaguutigitinneqalerput, aamma qallunaatut.



Ulloq 21. juni 2009 Namminersorneq pillugu inatsisip tunniunneqarnera

INATSIARTUT NAALAKKERSUISULLU – qinikkanik inatsisiliortoqarnerup tunngavii

Inatsisiliortutut aqqissuussinerup tunngavigai inatsisiliortut (Inatsisartut) Naalakkersuisullu akisussaasutut pissaanermillu tigumminittutut avissaartinneqarsimanerat. Naalakkersuisut Siulittaasuat Inatsisartut qinertarpaat, Naalakkersuisullu, Naalakkersuisut Siulittaasuata katitigai, Inatsisartut akuersissutigisassaraat. Inatsisartut Naalakkersuisunik Naalakkersuisuniluunniit ilaasortanik ataasiakkaanik iluarinnigpata Naalakkersuisut, Naalakkersuisuniluunniit ilaasortaq pineqartoq Inatsisartut atuuttussaajunnaarsissinnaavaat. Akerlianik Naalakkersuisut Siulittaasuat qinersisoqarnissaanik aalajangiinnaavoq, taamaalillunilu Inatsisartut atorunnaarsissinnaallugit.

INNUTTAASUT SUNNIUTEQARNERAT – sinniisoqarnek aqutigalugit innuttaasut oqartussaaqataanerat

Inatsisartut Kalaallit Nunaanni innuttaasunit qinerneqartarput. Taamatut aqutseriaaseq taaneqartarpoq "sinniisoqarnek aqutigalugu innuttaasut oqartussaaqataanerat".

Inuit qinigaat (Inatsisartunut ilaasortat) qinersisartunut sinniisuutitatu atuuqput, atuuffimminilli isumaginninnerminni taamaallaat namminneq nalunneqatiginnissutsiminnit pituttugaallutik. Allatut oqaatigalugu qinersisartut Inatsisartut Inatsisartuniluunniit ilaasortaq peqqusinnaan-ngilaat aalajangersimasumik periuseqarluni iliuuseqaqqullugu.

Minnerpaamik ukiut sisamanngorneri tamaasa Inatsisartunut qinersisoqartarpoq, naalakkersuinermilu qinikkap qinersisartunit tatigineeruttup qinerneqaqqinnissani ajornakusoortissinnaavaa. Tamatuma qulakkeeqataaffigititarpaa inuit qinigaasa aalajangiinerinut qinersisartut sunniuteqaqataanissaat.

INATSIARTUNUT QINERSINEQ

Inatsisartut 31-inik ilaasortaqarput. Ilaasortat nalinginnaasumik ukiuni sisamani qinigaasarput, "maanaannarli" qinersisitsinissamut periarfissaqarluni. Inatsisartunut qinersinermut qinigassanngortissinnaapput:

- Partiit qinersinermi kingullermi Inatsisartuni ilaasortaataqalersut, sulilu Inatsisartuni sinniisuutitaqartut.
- Partiit nutaat kingullermik Inatsisartunik qinersisoqarnerani taasinerit akuerisat tamakkerlugit 1/31-illiisa amerlaqataannik qinersisartunit qinigassanngortitaqartinneqartut.
- Kisimiillutik qinigassanngortittut qinersisartunit ikinnerpaamik 40-nit qinigassanngortinneqartut.
- Kisimiillutik qinigassanngortittut katusseqatigiissimasut, qinigassanngortittullu ataasiakkaat qinersisartunit ikinnerpaamik 40-nit qinigassanngortinneqartut.



Inatsisartunut qinersineq

Partii ataaseq arlalinnik amerlanerpaamilli 62-inik qinigassanngortitsinnaavoq. Kalaallit Nunaat qinersivinnut assigiinngitsunut agguataa-gaanngilaq, taamalu qinersiviulluni ataasiinnaq.

Inatsisartunut qinigaasinnaassagaanni piumasaqaatit tulliini taaneqartut eqqortinneqarsimassapput ("qinigaasinnaanermut piumasaqaatit" taaneqartut):

- Qinigassanngortittoq qinigassanngortissinnaassaguni nammineerluni qinersisinnaasuusariaqarpoq (tassa imaappoq; Inatsisartunut qinersinermi taasisinnaatitaasariaqarpoq). Tamatuma tunngaviusumik nassatarissavaa qinigassanngortittup minnerpaamik 18-inik ukioqartuunissaa, Kalaallillu Nunaanni najugaqartuunissaa.
- Qinigassanngortittoq ima pissusilinnik pinerluuteqarsimasuussanngitsoq nalinginnaasumik paasinnittaaseq malillugu Inatsisartuni ilaasortaanissamut naleqqutinnngitsutut isigineqassanani ("qinigaasinnaassuseq pillugu misilitsinnermik" taaneqartartoq).

Qinigaasinnaanermut naleqquttutut isigineqarnissamik piumasaqaat naammassineqarsimanersoq qinersisoqareerneratigut Inatsisartunit aalajangerneqartarpoq Qinigaanerup Misilinneqarnissaanut Ataatsimiititaliap inassuteqarnera tunngavigalugu.

Qinersinerup inernerata naatsorsorneqarnerani taasinerit ukununga immikkoortiterlugit kisinneqartarput:

- partiit qinigassanngortitaasalu taaneqarneri.
- kattusseqatigiillutik qinigassanngortittut taaneqarneri.
- kisimiillutik qinigassanngortittut qinerneqarneri.

Qinersereernerup kingorna ilaasortaatitassat D'Hondtip agguariaasia naapertorlugit agguataarneqartarput. Partii kattusseqatigiilluunniit inissat pissarsiarineqartut inuttalernerneqarnissaannut naammangitsunik qinigassanngortitaqarsimappata, inissaq partiip kattusseqatigiilluunniit agguaanermi kisitsisitigut tullinnguuttut pissarsiarissavaat. Partiit, kattusseqatigiit kisimiillutilluunniit qinigassanngortittut arlallit agguaanerni kisitsisaat assigiippata makitsinikkut inissaq kikkut pissarsiarissaneraat aalajangerneqassaaq. Tamanna aamma atuuppoq partiit kattusseqatigiilluunniit qinigassanngortitaat arlallit amerlaqatigiinnik taaneqarsimagaangata.



Inatsisartut kaffisortarfiat Inatsisartunut siulittaasuusarsimasut assiiniq qalipakkanik assilialik

QINIKKAT AGGUATAAGANERAT

Ulloq 24. april 2018 qinersineq qinikkat ima agguataarneqarnerannik inerneqarpoq:

Siumut	ilaasortat 10
Inuit Ataqtigiit	ilaasortat 8
Demokraatit	ilaasortat 6
Partii Naleraq	ilaasortat 3
Atassut	ilaasortat 2
Nunatta Qitornai	ilaasortat 1
Suleqatigiisitsisut	ilaasortat 1

INATSIARTUT SIULITTAASQARFIAT

Inatsisartunut qinersisoqarnerata kingunitsianngua taamatullu ukiut tamaasa ukiakkut katersuunnerup aallartinnerani Inatsisartut siulittaasussaminnik siulittaasullu tullersortissaannik sisamaasunik qinersisarput, ataatsimut katillutik Inatsisartut siulittaasoqarfiattut atuuffeqartumik. Siulittaasoqarfik Inatsisartunut avammut kiinner-tartuuvoq, sulinerullu piareersaasiorneqarnerata ingerlanneqarneratalu isumannaatsuutinnissaanut qulakkeerinnittuussaalluni.



Inatsisartut Siulittaasoqarfiat siulittaasoq Hans Enoksen qiterlersaralugu

INATSIARTUT UKIOQ SULIFFIAT

Inatsisartut ukiuat aallartittarpoq septembarimi ukiorlu ataaseq atuuttarluni. Inatsisartut Inatsisartut ukiuanni minnerpaamik marloriarlutik ileqqusumik ataatsimiittarput, ukiakkut upernaakkullu.

Pissutsit immikkut pisariaqalersippassuk Inatsisartut immikkut ittumik aamma ataatsimiigaaqquneqarsinnaapput.

Piffissaq Inatsisartut ataatsimiinnerisa avataaniittoq naalackersuinnikkut sulinermut tullianillu ataatsimiinnissap piareersarneqarneranut atorneqartarpoq. Tamatuma saniatigut Inatsisartut ataatsimiitaliaasa sulinerat Inatsisartut ukiuat tamakkerlugu pisarpoq, tassa imaappoq aamma Inatsisartut ataatsimiinnerisa avataatigut.



Inatsisartut qinigaarlaat inissititernerannut atatillugu ingerlaaqatigiinneq 15. maj 2018

ATAATSIMIITITALIAT

Inatsisartut ataatsimiititalianik arlalinnik pilersitsisarput. Ataatsimiititaliat tamarmik immikkut tallimanik ilaasortaqaqartarput, peqatigillugu Naalakkersuisunut ilaasortaasinnaanngitsunik. Inatsisartut ataatsimiititaliaat arfinillit – "ataatsimiititaliat inatsisit naaportorlugit pilersinneqartussatut" taaneqartartut – pinngitsooratik pilersitassaapput. Taakku tassa:

- Siulittaasoqarfik
- Aningaasaqarnermut Akileraartarnermullu Ataatsimiititaliaq
- Inatsisinut Ataatsimiititaliaq
- Kukkunersuineranut Ataatsimiititaliaq
- Nunanut Allanut Sillimaniarnermullu Ataatsimiititaliaq
- Suleriaaseq pillugu Ataatsimiititaliaq
- Qinigaanerup Misilinneqarnissaanut Ataatsimiititaliaq

Taakku saniatigut Inatsisartut ataatsimiititalianik ataavartunik arlalinnik pilersitsisarput, taakkulu qassiunissaat sunillu suliaasaqarfeqarnissaat Inatsisartut piumassusertik malillugu ukiumiit ukiumut aalajangersarsinnaavaat. Maannakkut Inatsisartut makkuninga ataavartunik ataatsimiititaliaqarput:

- Sanaartornermut Ataatsimiititaliaq
- Inuusutissarsiornermut Aatsitassanullu Ataatsimiititaliaq
- Ilaqutariinnermut Peqqissutsimullu Ataatsimiititaliaq
- Aalisarnermut, Piniarnermut Nunalerinerimullu Ataatsimiititaliaq
- Eqqissimatitsineranut Avatangiisinullu Ataatsimiititaliaq
- Kultureqarnermut, Ilinniartitaaneranut, Ilisimatusarnermut Ilageeqarnermullu Ataatsimiititaliaq
- Tunngaviumut Inatsisissamut Isumalioqatigiissitaq pillugu Ataatsimiititaliaq

Ataatsimiititaliat suliaasa pingaarnersaraat inatsisissatut siunnersuutitut Inatsisartut ataatsimiititaliamut suliarisassanngortitaannut tunngatillugu misissuinissaq inassuteqaateqarnissarluni. Tamakku saniatigut ataatsimiititaliap susassaqaqfimminut tunngasut alaatsinaatassarai, Naalakkersuisullu inatsisitigut killiliussat iluanni



Inatsisartut ataatsimiititaliaasa ataatsimiittarfianni ataatsimiititaliap ataatsimiinnera

sulinersut nakkutillisuuffigissallugu.

Tamanna siunertaralugu ataatsimiititaliat Naalakkersuisunut ilaasortamik apersorneqarnissaa siunertaralugu ataatsimiigiaqqusisinaapput, naalakkersuisunut ilaasortaqaq susassaqaqtoq pisussaalluni takkunnissaminut ataatsimiititaliallu apeqquatai akiorlugit.

Innuttaasut kikkulluunniit aamma ataatsimiititaliamut sassarnissaminut periarfissaqarput. Tamanna ilaatigut isumaqarpoq ass. peqatigiiffiit, suliniaqatigiiffiit, suliffeqarfiit kommunilluunniit arlaannik uummammioqarunik tamatuma ataatsimiititalianut saqqummiunneqarnissaanut kissaateqarsinnaasut apeqquutillu aalajangersimasut ataatsimiititaliamut maluginiaqqullugit.

Ataatsimiititaliat inississornerat nalinginnaasumik ukiakkut kater-suunnerup aallartinnerani pisarpoq, ataatsimiititaliallu inississornerid 'Hondip periusaa malillugu ingerlanneqartarluni.

SULIASSAT PISINNAATITAAFFILLU

Inatsisiliortussaataaernerup kinguneraa Inatsisartut aningaasaqarnermut tunngasutigut (Nunatta Karsianut) pissaanermik tamakkiisumik tigumminittuunerat. Aningaasartuut sunaluunniit aamma akileraarutit akitsuutillu suulluunniit Inatsisartut akuersiseqqaarnagit akilersinniarneqarsinnaanngillat. Ukiut tamaasa aningaasanut inatsisissaq, Namminersorlutik Oqartussat aningaasartuutissaannut isertitassaannullu killigititassanik aalajangiisuususaq Inatsisartut akuersissutigisarpaat. Aningaasanut inatsisissaq atorlugu ukiumi aningaasaliiffiusumi aningaasat atugassarisat agguataarlugit ator-neqarnissaat pingaarnersiuerillu Inatsisartut akuersissutigisarpaat, taamatut agguataareriaaseq Naalakkersuisut sanioqqutassarinngilaat. Naalakkersuisullu aningaasartuutunik aningaasanut inatsimmik akuersinerup nalaani naatsorsuutigineqarsinnaasimanngitsunik aningaasartuuteqarnissamik Inatsisartunit akuerineqarsinnaapput.

Taamatut akuersissuteqartoqarsinnaanersoq Inatsisartut tamarmiusut sinnerlugit Aningaasaqarnermut Akileraartarnermullu Ataatsimiititaliap aalajangertarpa. Tamatuma kingorna Aningaasaqarnermut Akileraar-tarnermullu Ataatsimiititaliap aningaasaliissutigisai ukiumoortumik ilassutitut aningaasaliisoqarnissaanut inatsisit akuersissutiginerisigut Inatsisartut tamarmiusut akuersissutigisarpai.

Naalakkersuisut ingerlatsinerat Inatsisartut killiliussatut akuersissutigisaasa iluanni pissaaq (inatsisitut aningaasaliissutitullu ilusilikkat). Tamanna ilaatigut Nunatta Karsiata naatsorsuutaasa kukkunersiorneqartarnerisigut Inatsisartut nakkutigisussaavaat. Inatsisartutaaq Naalakkersuisut inatsisinut aamma ingerlatsinikkut ileqqorissaarnissamut naapertuuttumik ingerlatsinerannik nakkutiliineramik suliaqartussamik Ombudsmandimik toqqaasarpur. Tassuma ilaatigut suliasarai Naalakkersuisut oqartussaasullu taassuma ataaniittut, inatsisit naapertorlugit pisortallu ingerlatsineranni ileqqorissaarnissaq naapertorlugit ingerlatsisoqarnissaanik nakkutiliinissaq.

Inatsisit Inatsisartut akuersissutigisaat Inatsimmut tunngaviumut, Namminersorneq pillugu inatsimmut nunaniluunniit assigiinngitsuni isumaqatigiissutitut akerliisuusangillat. Inatsisartutaaq inatsisiliaat inatsisilioriaatsip pitsaasup tunngavigisaannut naapertuutisapput.



Kalaallit Nunaata erfalasua Erfalorsput 1985-imi februaarimi nunatta erfalassaatut Inatsisartunit qinerneqarpoq. Ulloq 21. juni 1988 peqatigiiffik "Erfalorsput" erfalassumik Inatsisartunit tunissuteqarpoq.

Erfalassup Inatsisartut ataatsimiittarfianniitinerneqarnera Inatsisartuni taassutigineqaranilu oqallisigineqarnikuunngilaq. Namminerli erfalassorneq tulluusimaarutigineqarpoq, taamaattumillu aamma naatsorsuutigisari-aarluni kikkut tamarmik pissusissamisoortikkaat erfalorsput Inatsisartut ataatsimiittarfianniitinerneqarpat.

INATSIILORNEQ

Inatsisartut ataatsimiinneranni makku oqaluuserisassanngortinneqarsinnaapput:

- **Inatsisissatut siunnersuutit**, Inatsisartunut ilaasortanit Naalakkersuisunilluunniit saqqummiunneqarsinnaasut. Inatsisissatut siunnersuutit Inatsisartuni pingasoriarlutik suliarineqaqqaartarput inaarutaasumik akuersissutigineqannginneranni.
- **Aalajangiiffigisassatut siunnersuutit**, tassaasarlutik siunnersuutit malittarisassat atuuttut allanngortinneqarnissaannut suliniteqarnissamut Naalakkersuisunik peqqusisut. Naalakkersuisut Inatsisartunulluunniit ilaasortat aalajangiiffigisassatut siunnersuuteqarsinnaapput Inatsisartuni marloriarlugit suliarineqartus-sanik inaarutaasumik akuersissutigineqannginneranni. Danskit inatsisaasa nunalluunniit tamalaat akornanni isumaqatigiissutit Kalaallit Nunaannut atuutilersinneqarnissaannik siunnersuutit aamma aalajangiiffigisassatut siunnersuutit suliarineqartarput, tamatumanili naalakkersuisut kisimik siunnersuuteqarsinnaal-lutik.
- **Nassuiaatit**, Naalakkersuisunit isumaqatigiinniarnissaq, tassa ataatsimiittarfimmi oqallisigineqarnissaat, siunertaralugu saqqummiunneqartut. Nassuiaatit ilaatiguinnaq oqaluuserineqar-lutik isumaqatigiinniutigineqartarput.
- **Apeqquteqaat aallaavigalugu oqallinnerit**, siunertarisarpaat apeqqutip pisortat ingerlatsinerannut tunngasup oqallisigalugu isumaqatigiinniutigineqarnissaa Naalakkersuisullu nassuiaate-qartinneqarnissaat. Apeqquteqaat aallaavigalugu oqallittoqar-nissaa Inatsisartunut ilaasortanit siunnersuutigineqarsinnaavoq.



Tusarnaariat issiavii puisip amiinik qalillit

Inatsisissatut siunnersuutip akuersissutigineqarnissaanut suleri-aaseq nalinginnaasoq ataani takussutissiarineqarpoq:

Inatsisissatut siunnersuut

Siullermeerinnineq

Tunngaviusumik oqaluuserinnineq

Ataatsimiititaliami suliarinnineq

Ataatsimiititaliami suliarinninnerup inernerissavaa isumaliutissiissuteqarneq akuersissutiginninnissamik, itigartitsinissamik allannguutissatulluunniit siunnersuummik saqqummiussinissamik inassutitalimmik

Aappassaaneerinnineq

Siunnersuummik sukumiinerusumik oqaluuserinnittoqarsinnaavoq allannguutissatullu siunnersuummik saqqummiussisoqarsinnaalluni Aappassaaneerinnineq allannguutissatut siunnersuutaajunnartut taasisutiginerinik inerneqassaaq

Ataatsimiititaliamit nutaamik suliarinnissinnaaneq

Qaqutigorsuaannaq pisarpoq

Ataatsimiititaliami suliarinninnerup inernerissavaa ilassutitut isumaliutissiissuteqarneq akuersissutiginninnissamik, itigartitsinissamik allannguutissatulluunniit siunnersuummik saqqummiussinissamik inassutitalimmik

Pingajussaaneerinnineq

Inaarutaasumik akuersissutiginnineq itigartitsinerluunniit

INATSIARTUT ALLATTOQARFIAT

Inatsisartut allaffissornikkut sullinneqarnerat Inatsisartut Allattoqarfiata isumagisaraa. Matumani ilaalluni Siulittaasoqarfiup sullinneqarnera, Inatsisartut ataatsimiinnerisa piareersarneqarnera aqqissuussaasumillu ingerlanneqarnissaa, ataatsimiititaliat sullinneqarnerat ulluinnarnilu allaffissornikkut ingerlatsineq.

Tamatuma saniatigut saqqummersitsinerit, Inatsisartut Allattoqarfiata takusassarsiorfigineqarnera imaluunniit pilersaarutit annertuut assersuutigalugu Inuusuttut Inatsisartoqarnissaanut piareersarnerit ingerlanneqarnissaallu allattoqarfiup isumagisarpai.



Paasissutissiinerni Tusagassiortunillu katersuutitsisarfik

INATSIARTUT PULAAKKIT

Inatsisartut ataatsimiittarfianni oqallinnerit kikkulluunniit tusarnaariarsinnaavaat. Aamma Inatsisartut ataatsimiinngikkaangata Inatsisartut ataatsimiittarfiat ulluinnarni nal. 13.00-miit takornariarneqarsinnaavoq. Takornariarusukuit tamanna pillugu inatsisartut.gl/ takuniaanerit atorlugu saaffiginnissaatit.

Inatsisartut oqallinneri kalaallisut qallunaatullu malittarineqarsinnaapput (Inatsisartut "toqqaannartumik" oqaluttaasa nutsigaannik). Inatsisartut katersuunnerini oqallinnerit KNR TV-kkut ataatsimiittarfimmiit toqqaannartumik aallakaatinneqartarput. Oqallinneq aamma internettikkut malinnaavigineqarsinnaavoq ugguuna inatsisartut.gl/ataatsimiinnerit.



**PAASISAQARNERORUSUKKUIT INA.GL
TOORUK**

Inatsisartut · Postboks 1060 · 3900 Nuuk
Telefon +299 34 50 00
ina@ina.gl · www.ina.gl